




Ս. ԷԶՄԻԱԾՆԻ ՀՈԳԵՎՈՐ ԾԵՄԱՐԱՆԻ 1970—1971 ՈՒՍՈՒՄՆԱԿԱՆ ՏԱՐԵԾՐՋԱՆԻ ԲԱՑՈՒՄԸ

Սեպտեմբերի 7-ին, երկուշաբթի օրը, առավոտյան ժամը 11.30-ին, տեղի ունեցավ հոգևոր ճեմարանի 1970—1971 ուսումնական տարվա հանդիսավոր բացումը:

Հանդիսությունը նախագահում էր Վեհափառ Հայրապետը:

Ներկա էին Մայր Աթոռի միաբանությունը, Գերագույն հոգևոր խորհրդի անդամները, ճեմարանի դասախոսական կազմը, Մայր Աթոռի պաշտոնեությունը և բազմաթիվ ծնողներ:

Հանդիսությունը բացվեց Հայկական ՍՍՀ պետական հիմնի նվագով: Ապա հոգևոր ճեմարանի երգչախումբը կատարեց «Որք զարդարեցին» թարգմանչաց շարականը: Այնուհետև հոգևոր ճեմարանի դասախոս տ. Գևորգ վրդ. Սերադյառյանը ընթերցում է Մատթեոսի Ավետարանից «Սերմնացանի առակ»-ը: Երգչախումբը կատարում է «Աշակերտք Քրիստոսի» շարականը:

Ապա հոգևոր ճեմարանի տեսուչ տ. Ծնորիք վրդ. Գասպարյանը հանդես է գալիս բացման ոգևորիչ ճառով և վեր է հանում հոգևոր ճեմարանի դերը ինչպես անցյալում, այնպես էլ մեր օրերում հայ եկեղեցու պաշտության և մեր ժողովրդի հոգևոր, քրիստոնեական և հայրենասիրական դաստիարակության շնորհակալ գործում:

Տեսուչ հայր սուրբը կոչ է անում ուսանողությանը՝ լինել համեստ, խելացի, աշխատել

տեղ ավելի արդյունավետ կերպով, գիտություն ամբարել, պատրաստվել գալիք օրերի ծառայության սուրբ գործին, որին անհամբեր սպասում են մեր եկեղեցին, մեր ժողովուրդը: Տեսուչ վարդապետը ջերմ լավատեսությամբ վստահեցնում է Վեհափառ Հայրապետին, որ Աստծու օգնությամբ և Ն. Ս. Օծության անմիջական հոգատարության ներքո այս տարի ևս ճեմարանի կամարների տակ, ձեռք-ձեռքի տված դասախոսների հետ, միասնական ու սիրով կաշխատեն՝ իր կոչման բարձրության վրա պահելու ուսումնա-դաստիարակչական գործը հոգևոր ճեմարանում:

Իր խոսքի վերջում տեսուչ հայր սուրբը հայցում է Վեհափառ Հայրապետի օրհնությունը սույն ծանր, պատասխանատու, սակայն պատվաբեր գործը հաջողությամբ պսակելու համար:

Ա լսարանի ուսանող Վրեժ Նաջարյանը ընթերցում է մի հատված Նարեկից՝ ս. Հոգու շնորհաբաշխությանը նվիրված:

Ապա խանդավառ մթնոլորտում հանդես է գալիս Վեհափառ Հայրապետը և իր հայրական խրատներով և հորդորներով մի անգամ ևս քաջալերում ուսանողությանը:

Հանդիսությունը վերջանում է Վեհափառ Հայրապետի «Պահպանիչ»-ով և խմբովին երգված Տերունական աղոթքով:

Ժամը 13.30-ին Վեհափառ Հայրապետը

բարեհաճում է Վեհաբանում ընդունել դասախոսական կազմին շնորհավորում ուսումնական նոր տարին օրհնում նրանց աշխատանքը, տալիս մի շարք կարևոր խորհուրդներ և թելադրություններ ուսումնա-դաստիարակչական աշխատանքների վերաբերյալ:

Սեպտեմբերի 8-ին, առավոտյան ժամը 9.30-ին, ուրախ ու տոնական է հնչում Գեմարանի հարկի տակ 1970—1971 ուսումնական տարվա առաջին զանգը:

Այս տարի հոգևոր Գեմարանում կատարվեց 15 նոր ուսանողների ընդունելություն:

Հոգևոր Գեմարանում ուսանողության ընդհանուր թիվն է 46՝ բաժանված հետևյալ դասարանական և լսարանական բաժինների վրա.

Ա դասարան՝ 14

Բ դասարան՝ 9

Գ դասարան՝ 10,

Ա լսարան՝ 7,

Գ լսարան՝ 6:

Այս ուսումնական նոր տարվա առիթով սպասվում են ուսանողներ և՛ Լիբանանից, և՛ Երուսաղեմից:

